

1599

Inde illud quoque contigerat, ut, maritimarum rerum cura neglecta, litoralia loca incursionibus paterent; quo fiebat, ut Ferdinandus, Magnus Hetruriæ Dux, post direptas præteritis annis Patras, triremes quinque, tormentis, scalis, lignibus, atque aliis ad arces oppugnandas egregie instructas, Virginii Ursini nepotis ductu emitteret; qui in Aegæum delatus, in insulam Chium trecentis circiter militibus eductis, urbem improvise adortus, Turcis perterrefactis, atque in montes propinquos diffugientibus, occupavit; licet mox de paucitate hostium edocti, ingenti impetu ruentes, centum cæsis, plerisque fauciatis, Hetruscos in triremes compellerent; qui, aliquot paucis Christianis in libertatem vindicatis, accessere. Harum rerum successus licet Byzantium perlati Mehemetem maxime commoverent, nihil tamen vel ad obsistendum, vel ad impediendum parabatur; eo anno triginta tantum triremibus e navalibus emissis, quarum viginti in Euxinum, decem sub Assano Cicala præfecto in Aegæum mare missæ sunt.

*Chios a Virginio Ursino cum Hetrusco milite capta.*

*Mauro abani ex Batica regione ad auxilia petenda Byzantium mittunt.*

Per eos dies Hieronymi Capellii, Reipublicæ ad Mehemetem legati, literæ ad Senatum allatæ: ex Hispania Batica provincia Mahumetanæ superstitionis hominem ad regiam pervenisse, qui, ut mos levissimæ & credulæ gentis est, cum ad suos a servitute eximendos auxilia a Turcis facile impetrari posse sibi suavisset, purpuratorum atque aliorum turcicæ gentis procerum animos ad Mauros, qui in Batica provincia erant, liberandos variis rationibus incitabat: id in primis, quod christianis sacris per vim addicerentur, graviter conquestus. Is cum libenter initio audiretur, atque inde existimationem aliquam nactus esset, mox, vel difficultate, vel hominis levitate cognita, cum concepta opinione excidisset, rem nefariam atque teterrimam aggressus, crebris sermonibus summa affectione & contentione jactabat, nisi Jesu Christi sepulchrum Christianis adimeretur, franciscanæque religionis viri, quorum custodiæ concreditum erat, pellerentur, numquam de Christianis Turcas victoriam relatuuros: non aliam ob causam Rodulphum Imperatorem vincere, nisi quod crebra donaria ad eum locum deferri curaret, nuper argenteis candelabris, summa arte ex argento elaboratis, eo transmissis. Ea cum supremus Bassa Regi

re-